

Na osnovu člana 16. stav 1. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10) i člana 17 stav 2. Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 1/14), na prijedlog Ministarstva za boračka pitanja, Vlada Zeničko-dobojskog kantona, na 172. sjednici održanoj dana 10.07.2014. godine, d o n o s i

U R E D B U

O DODJELI KREDITA ZA ZAPOSŁJAVANJE BRANILACA I ČLANOVA NJIHOVIH PORODICA

DIO PRVI - OPĆE ODREDBE

Član 1.

(Predmet Uredbe)

Ovom Uredbom utvrđuju se uvjeti, način i postupak ostvarivanja prava na dodjelu kreditnih sredstava u svrhu trajnog zapošljavanja branilaca i članova njihovih porodica, koji imaju prebivalište na području Zeničko-dobojskog kantona (u daljnjem tekstu: Kanton), kao i povratnika u Republiku Srpsku koji ostvaruju osnovna prava iz branilačko-invalidske zaštite u općinama Kantona i koji su na evidenciji nadležnog organa za vojne evidencije u općinama Kantona.

Član 2.

(Korisnici prava)

Pravo na dodjelu kreditnih sredstava po ovoj Uredbi mogu ostvariti:

- a) dobitnici ratnih priznanja ili odlikovanja;
- b) ratni vojni invalidi;
- c) demobilizirani branioci koji su u periodu od 06.04.1992. do 23.12.1995.godine u sastavu Oružanih snaga proveli najmanje 24 mjeseca;
- d) članovi porodice šehida, poginulih, umrlih i nestalih branilaca i umrlih ratnih vojnih invalida;
- e) članovi uže porodice poginulih, umrlih ili nestalih dobitnika ratnog priznanja ili odlikovanja.

Član 3.

(Posebni korisnici)

Prava po ovoj Uredbi može koristiti i:

- a) dijete šehida, poginulog, umrlog, nestalog branioca, kojem je prestalo pravo na porodičnu invalidninu, do navršene 35. godine života;
- b) dijete poginulog, umrlog ili nestalog dobitnika ratnog priznanja ili odlikovanja, osim lica iz tačke a) ovog člana, kojem je prestalo pravo na mjesečni novčani dodatak i dijete umrlog ratnog vojnog invalida koje nije korisnik prava na porodičnu invalidninu, do navršene 30. godine života;
- c) dijete umrlog demobiliziranog branioca koji je u redovima Oružanih snaga proveo najmanje dvije godine i koje je sa istim živjelo u zajedničkom domaćinstvu ili ga je isti izdržavao najmanje posljednju godinu dana prije smrti, do navršene 30. godine života;
- d) udovica umrlog demobiliziranog branioca koji je u redovima Oružanih snaga proveo najmanje dvije godine, i koja je sa istim živjela u braku najmanje dvije posljednje godine

dana prije smrti, pod uvjetom da nema druge prihode i da nije stupila u brak ili vanbračnu zajednicu;

- e) roditelji umrlog ratnog vojnog invalida ili demobiliziranog branioca koji je u redovima Oružanih snaga proveo najmanje dvije godine, ukoliko ih je isti izdržavao posljednjih godinu dana prije smrti.

Član 4.

(Posebni uvjeti)

Pravo na dodjelu kreditnih sredstava, lica iz člana 2. i 3. ove Uredbe mogu ostvariti pod uvjetom da:

- a) imaju prebivalište na području Kantona u trajanju od najmanje dvije godine neprekidno, osim povratnika u Republiku Srpsku;
- b) prava iz oblasti branilačko-invalidske zaštite ostvaruju u općinama Kantona;
- c) nisu u radnom odnosu;
- d) oni i članovi njihovog porodičnog domaćinstva nisu vlasnici ili suvlasnici subjekta koji obavlja privrednu ili drugu djelatnost, registriranog kao pravno ili fizičko lice;
- e) nisu korisnici kredita za zapošljavanje ostvarenog po drugom osnovu iz sredstava budžeta Kantona;
- f) nisu korisnici kredita i drugih sredstava za podsticaj zapošljavanja ostvarenog putem Službe za zapošljavanje.

Član 5.

(Pojmovi i definicije)

- (1) Pojmovi korišteni u Uredbi: dobitnik ratnog priznanja ili odlikovanja, ratni vojni invalid, demobilizirani branilac, član porodice šehida, poginulog, umrlog, nestalog branioca i umrlog ratnog vojnog invalida i član uže porodice poginulog, umrlog ili nestalog dobitnika ratnog priznanja ili odlikovanja, upotrijebljeni su u skladu sa odredbama Zakona o pravima branilaca i članova njihovih porodica ("Službene novine Federacije Bosne i Hercegovine" broj 33/04, 56/05, 70/07 i 9/10) i Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" broj 70/05, 61/06 i 9/10).
- (2) Djetetom dobitnika ratnog priznanja ili odlikovanja/ratnog vojnog invalida/demobiliziranog branioca, u smislu ove Uredbe, smatra se dijete rođeno u braku/van braka, usvojeno dijete, kao i pastorče koje je sa istim živjelo u zajedničkom domaćinstvu najmanje posljednju godinu dana.

Član 6.

(Dokazivanje statusa)

U postupku ostvarivanja prava po ovoj Uredbi, branioci i članovi njihovih porodica svoj status dokazuju rješenjem nadležnog organa o priznavanju prava na ličnu i porodičnu invalidninu za ratnog vojnog invalida odnosno člana porodice šehida, poginulog, umrlog, nestalog branioca ili umrlog ratnog vojnog invalida; o priznavanju prava na mjesečni novčani dodatak za dobitnike ratnih priznanja i odlikovanja i članove uže porodice poginulog, umrlog ili nestalog dobitnika ratnog priznanja ili odlikovanja; uvjerenjem nadležnog organa o periodu učešća u Oružanim snagama za demobiliziranog branioca, te na osnovu smrtnog lista i uvjerenja o učešću u Oružanim snagama umrlog demobiliziranog branioca, izdatog u skladu sa Zakonom o upravnom postupku ("Službene novine FBiH" broj 2/98 i 48/99).

Član 7.

(Visina kredita)

Kreditna sredstva po ovoj Uredbi se mogu odobriti u maksimalnom iznosu do 30.000,00 KM.

Član 8.
(Uvjeti dodjele kredita)

Kredit se dodjeljuje pod slijedećim uvjetima:

- a) rok otplate do 10 godina;
- b) grace period do 24 mjeseca;
- c) kamatna stopa 3% godišnje;
- d) zatezna kamata 3% godišnje;
- e) instrumente osiguranja vraćanja kredita određuje izabrana banka, u skladu sa pravilima struke.

Član 9.
(Ponovna dodjela kredita)

- (1) Branioci i članovi njihovih porodica mogu samo jednom koristiti sredstva iz ove kreditne linije.
- (2) Izuzetno od odredbi stava (1) ovog člana, kreditna sredstva mogu biti odobrena i drugi put braniocima i članovima njihovih porodica koji su uredno i u roku izvršili obaveze i povrat sredstava iz prethodno odobrenog kredita i pod uvjetom da će sredstva po novom kreditu upotrijebiti za zapošljavanje nezaposlenih branilaca i članova njihovih porodica iz člana 2. i 3. ove Uredbe.

DIO DRUGI - POSTUPAK DODJELE KREDITA

Član 10.
(Podnošenje zahtjeva)

- (1) Pravo na dodjelu kredita po ovoj Uredbi može se ostvariti podnošenjem zahtjeva općinskoj službi nadležnoj za poslove branilačko-invalidske zaštite u općini u kojoj podnosilac zahtjeva ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: općinska služba).
- (2) Zahtjev iz stava (1) ovog člana podnosi se na posebnom obrascu kojeg propisuje ministar Ministarstva za boračka pitanja Zeničko-dobojskog kantona (u daljnjem tekstu: Ministarstvo) u roku od osam dana od dana stupanja na snagu ove Uredbe.

Član 11.
(Dokumentacija)

Uz zahtjev za dodjelu kredita kandidati prilažu sljedeću dokumentaciju:

- a) dokaz o statusu branioca i člana porodice branioca;
- b) fotokopiju lične karte;
- c) uvjerenje o prebivalištu;
- d) uvjerenje Službe za zapošljavanje o statusu nezaposlenog lica;
- e) investicioni program za obavljanje djelatnosti - biznis plan;
- f) dokaz o riješenim imovinsko-pravnim odnosima za zemljište i ostale nekretnine koje u realizaciji programa namjeravaju koristiti;
- g) uvjerenje Porezne uprave.

Član 12.
(Postupak po zahtjevu)

U postupku po zahtjevu općinska služba je dužna u narednom roku od petnaest dana:

- a) utvrditi kompletnost podnesene dokumentacije i zahtijevati otklanjanje uočenih nedostataka i eventualnu dopunu dokumentacije;

- b) u slučaju potrebe izvršiti neposredan uviđaj u stvarima iz zahtjeva;
- c) sačiniti prijedlog o odobravanju ili neodobravanju kredita i isti sa kompletnom dokumentacijom dostaviti Ministarstvu.

Član 13.
(Komisija)

- (1) Podnesene zahtjeve za dodjelu kreditnih sredstava po ovoj Uredbi razmatra komisija Ministarstva za dodjelu kredita (u daljnjem tekstu: Komisija), koju rješenjem imenuje ministar Ministarstva u roku od osam dana od stupanja na snagu ove Uredbe.
- (2) O radu Komisije vodi se zapisnik.
- (3) Zadatak Komisije je da po svakom podnesenom zahtjevu :
 - a) razmotri podnesenu dokumentaciju;
 - b) u slučaju potrebe izvrši neposredan uviđaj u stvarima iz zahtjeva;
 - c) izvrši ocjenu realnosti i ostvarivosti ponuđenog programa;
 - d) sačini obrazloženi prijedlog o odobravanju podnesenog zahtjeva za dodjelu kredita ili odbijanju kredita i isti dostavi ministru Ministarstva.
- (4) Na zahtjev Komisije kandidati su dužni dostaviti na uvid i drugu dokumentaciju od značaja za donošenje odluke o dodjeli kredita.

Član 14.
(Lista prvenstva)

U slučaju većeg broja prijedloga za odobravanje kredita, Komisija će sačiniti listu prioriteta na osnovu procjene kvaliteta ponuđenog investicionog programa.

Član 15.
(Donošenje odluke)

- (1) Na prijedlog Komisije i u skladu sa ovom Uredbom, o dodjeli kredita za zapošljavanje odlučuje ministar Ministarstva, koji istovremeno utvrđuje dinamiku i broj odobrenih kredita u skladu sa raspoloživim budžetskim sredstvima namjenjenim za ovu svrhu.
- (2) Ministarstvo dostavlja općinskim službama obavijest o stavu po zaprimljenim prijedlozima, uz povrat kompletne dokumentacije.

Član 16.
(Reprogram kredita)

- (1) U slučajevima kada korisnik kredita zbog opravdanih razloga nije u mogućnosti vršiti redovnu otplatu kredita, može se odobriti reprogramiranje postojećeg kredita.
- (2) Reprogram kredita može biti odobren jednom u periodu trajanja kreditnog odnosa, na period od najduže osam godina.
- (3) Zahtjev za reprogram kredita korisnik podnosi Ministarstvu, sa dokazima iz kojih su vidljivi razlozi nemogućnosti redovnog sevisiranja kreditnih obaveza.
- (4) Na prijedlog Komisije, odluku o odobravanju reprogramiranja kredita donosi ministar Ministarstva.
- (5) Odluka iz stava (4) ovog člana dostavlja se na realizaciju izabranoj banci.

Član 17.
(Otpis kredita)

U opravdanim slučajevima kada korisnik kredita ili njegov nasljednik nije u mogućnosti da redovno servisira vraćanje kredita (smrt ili teško oboljenje korisnika kredita, uništenje imovine usljed više sile i u drugim vanrednim situacijama kada nije moguće naplatiti kredit a da se korisnik ne dovede u izuzetno tešku egzistencijalnu situaciju), kao i u slučajevima kada izabrana banka obavijesti Ministarstvo o nemogućnosti naplate potraživanja, Vlada Kantona, na prijedlog ministra Ministarstva, može donijeti zaključak o djelomičnom ili otpisu u cjelini ostatka duga po kreditu.

Član 18.
(Izdavanje rješenja)

- (1) Na osnovu dostavljene obavijesti Ministarstva, općinska služba donosi rješenje o odobravanju kredita, odbijanju ili odbacivanju zahtjeva.
- (2) O žalbi na rješenje općinske službe rješava Ministarstvo.

Član 19.
(Obavješćavanje Službe za zapošljavanje)

Po isteku grace perioda predviđenog ovom Uredbom, Ministarstvo dostavlja obavijest Službi za zapošljavanje o korisnicima kredita, u cilju njihovog brisanja sa evidencije nezaposlenih lica.

Član 20.
(Realizacija kredita)

- (1) Krediti se realizuju putem izabrane banke, sa kojom ugovor zaključuje ministar Ministarstva.
- (2) Ugovorom iz stava (1) ovog člana utvrdit će se obaveza izabrane banke o dostavljanju Ministarstvu mjesečnih izvještaja o odobrenim i realiziranim kreditima.

DIO TREĆI - ZAVRŠNE ODREDBE

Član 21.
(Sredstva za ostvarivanje prava)

Sredstva za dodjelu kredita za zapošljavanje branilaca i članova njihovih porodica osiguravaju se u Budžetu Kantona u skladu sa prilivima sredstava.

Član 22.
(Evidencija i obrasci)

Elektronsku evidenciju o podnesenim zahtjevima i korisnicima prava po ovoj Uredbi vode općinske službe i Ministarstvo, po posebnim obrascima koje propisuje ministar Ministarstva u roku od osam dana od dana stupanja na snagu ove Uredbe.

Član 23.
(Instrukcije i nadzor)

- (1) U realizaciji ove Uredbe ministar Ministarstva može donijeti odgovarajuće instrukcije.
- (2) Nadzor nad provođenjem ove Uredbe ima Ministarstvo.

Član 24.
(Ravnopravnost spolova)

Sve imenice koje se odnose na braniocima i članovima njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 25.
(Primjena odredbi)

Odredbe člana 16. i 17. ove Uredbe odnose se i na dospjele a neizvršene kreditne obaveze po osnovu kredita namijenjenih zapošljavanju branilaca i članova njihovih porodica, dodijeljnih od strane Ministarstva u periodu primjene prethodnih akata na osnovu kojih je vršena dodjela kredita u ovu svrhu.

Član 26.
(Stavljanje Uredbe van snage)

Danom stupanja na snagu ove Uredbe prestaje važiti Uredba o dodjeli kredita za zapošljavanje branilaca i članova njihovih porodica ("Službene novine Zeničko-dobojskog kantona" broj 3/08 i 2/13).

Član 27.
(Stupanje na snagu i objavljivanje Uredbe)

Uredba stupa na snagu danom donošenja, a ista će biti objavljena u "Službenim novinama Zeničko-dobojskog kantona".

Broj: 02-_____ /14.
Datum, 10.07.2014. godine
Zenica

PREMIJER

Munib Husejnagić, dipl.ing.maš.

DOSTAVLJENO:

1x Ministarstvo za boračka pitanja,
1x Ministarstvo finansija,
1x Službene novine Zeničko-dobojskog kantona,
1x a/a.